

四庫全書

集部

# 欽定四庫全書

集部

權文公集卷十六至

詳校官太常寺少卿臣陳桂森

檢討臣何思鈞覆勘

總校官編修<sub>臣</sub>王燕緒

校對官中書<sub>臣</sub>劉源溥

謄錄監生<sub>臣</sub>魏朥年

欽定四庫全書

權文公集卷六

唐 權德輿 撰

雜詩

早夏青龍寺致齋憑眺感物因書十四韻

寺壁有舅

氏庶  
子詩

曉出文昌宮  
憩茲青蓮宇  
潔齋奉明祀  
憑覽傷夙古  
秦為三月火  
漢乃一坏土  
詐力自湮淪  
霸儀終莽鹵  
終南

橫峻極積翠洩雲雨首夏諒清和芳陰接場圃仁祠闕  
嚴淨稽首洗靈府虛室僧正禪危梁燕初乳通莊走聲  
利結駟乃旁午觀化復何如剗心信為愈盛時忽過量  
弱質本無取靜永環中樞益愧腰下組塵勞期抖擻陟  
降聊俯僂遺韻留壁間淒然感東武

仲秋朝拜昭陵

清秋壽原上詔拜承吉卜嘗讀貞觀書及茲幸齋沐文  
皇昔潛耀隋季自顛覆撫運斯順人救焚非逐鹿神祇

戴元聖君父納大麓良將授兵符直臣調鼎餽無疆傳  
慶祚有截荷亭育仙馭凌紫氛神遊棄黃屋方祇護山  
跡先正陪巖腹杳杳九峻深沉沉萬靈肅鳥飛田已闕  
龍去雲猶簇金氣與林巒乾岡走崖谷吾皇弘孝理率  
土蒙景福擁佑乃清夷威靈諒回復禮承三公重心愧  
二卿祿展敬何所伸曾呂斧山木

拜昭陵出城與張秘監閣老同里臨行別承在

史館未歸尋辱清辭輒酬之

仲月當南呂晨裝拜穀林逢君在東觀不得話離襟策馬緣雲路開緘扣玉音還期纔浹日里社酒同斟

酬馮監拜昭陵迴途中遇雨見示

之子共乘輶清秋拜上霄

寢宮有上霄門

曙霞迎夙駕零雨濕

迴鑣甘谷行初盡軒臺去漸遙望中猶可辨耘鳥下山

椒

朔旦冬至攝職南郊因書即事

大明南至慶天正朔旦圓丘樂六成文軌盡同堯歷象

齋祠忝備漢公卿星辰列位祥光滿金石交音曉奏清  
更有觀臺稱賀處黃雲捧日瑞昇平

奉和張監閣老過八陵院題贈杜卿崔員外

崇飾山園孝理深萬方同感聖人心已聞東閣招從事  
每向西垣奉德音公府從容談婉婉賓階清切景沉沉  
與君跬步如同舍終日相期此盍簪

奉和鄭賓客相公攝官豐陵扈從之作

時充國  
薄使

五輅導靈輜千夫象繚垣行宮移曉漏綵仗下秋原莫

究希夷理空懷渙汗恩願神方蹈道傳聖乃尊尊共祝  
如山壽俄驚憑几言遐荒七月會彤璽百靈奔豹尾從  
風直鸞旗暎日翻塗芻聯法從營騎肅旌門杳靄虞泉  
夕淒清楚挽喧不堪程盡處嗚咽望文園

詹事府宿齋絕句

清齋四體泰白晝一室空摧頽有古樹騷屑多悲風

和王祭酒太社宿齋不得赴李尚書宅會戲書

見寄



元禮門前勞引望勾龍壇下阻歡娛此時對局空相憶  
博進何人更樂輸

酬裴端公八月十五日夜對月見懷

涼夜清秋半空庭皓月圓動搖隨積水皎潔滿晴天多  
病嘉期阻深情麗曲傳偏懷賞心處同望庾樓前

奉和崔閣老清明日候許閣老交直之際辱裴

閣老書招云與考功苗曹長先城南遊覽獨

行口號因以簡贈

時德輿以疾  
故有阻追遊

紫禁宿初迴清明花亂開相招直城外遠遠上春臺諫  
曹將列宿幾處期子玉深竹與清泉家家桃李鮮折芳  
行載酒勝賞隨君有愁疾自無悵臨風一搔首

和張秘監閣老獻歲過蔣大拾遺因呈兩省諸

公并見示

二賢同載筆久次入新年焚草淹輕秩藏書厭舊編竹  
風晴翠動松雪瑞光鮮慶賜行春令從茲佇九遷

酬崔舍人閣老冬至日宿直省中奉簡兩掖閣

老并見示

令節一陽新西垣宿近臣曉光連鳳沼殘漏近鷄人白

雪飛成曲黃鍾律應均層霄翔迅羽廣陌駐歸輪清切

晨趨貴恩華夜直頻輟才時所重

九月中楊閣老權知吏部選事

分命

秩皆真

十月中崔閣老正拜本官德輿正除禮部受命前一日分單詔詞

左掖期連茹

南宮愧積薪九年叨此地迴首倍相親

八月十五日夜瑤臺寺對月絕句

羸女乘鸞已上天仁祠空在鼎湖邊涼風遙夜清秋半

一望金波照粉田

仁祠寺也見後漢書楚王英傳

夏至日作

璿樞無停運四序相錯行寄言赫曦景今日一陰生

二月二十七日社兼春分端居有懷簡所思者

清晝開簾坐風光處處生看花詩思發對酒客愁輕社日雙飛燕春分百轉鶯所思終不見還是一含情

甲子歲元日呈鄭侍御明府

萬里煙塵合秦吳遂眇然無人來上國灑淚向新年世

故看風葉生涯寄海田屠蘓聊一醉猶賴主人賢

七夕

佳期人不見天上喜新秋玉珮霑清露香車渡淺流東  
西一水隔迢遞兩年愁別有穿針處微明月映樓

嘉興九月寄丹陽親故

窮年路歧客西望思茫茫積水曾南渡浮雲失舊鄉海  
邊尋別墅愁裏見重陽草露荷衣冷山風菊酒香獨謠  
看墜葉遠日遍秋光更羨登攀處烟花滿練塘

九日北樓宴集

蕭颯秋風樓上聞，霜風漠漠起陰雲。  
不見攜觴王太守，空思落帽孟參軍。  
風吟蟋蟀寒偏急，酒泛茱萸晚易醺。  
心憶舊山何見日，併將愁淚共紛紛。

奉陪李大夫九日龍沙宴會

得遲字

龍沙重九會千騎，駐旌旗。水木秋光淨，絲桐雅奏遲。  
烟蕪斂，暄色霜菊發，寒姿今日從公醉。全勝落帽時。

臘日龍沙會絕句

簾外寒江千里色林中罇酒七人期寧知臘日龍沙會  
却勝重陽落帽時

嚴陵釣臺下作

絕頂聳蒼翠清湍石磷磷先生晦其中天子不得臣心  
靈棲顥氣纓冕猶緇塵不樂禁中卧却歸江上春潛驅  
東漢風日使薄者醇焉用佐天子特此報故人知大  
賢心不獨私其身弛張有深致耕釣陶天真奈何清風  
後擾擾論屈伸交情同市道利欲相紛綸我行訪遺臺

仰古懷逸民，矧綴鴻鵠遠。雪霜松桂新，江流去不窮。山色凌秋旻，人世自今古。清輝照無垠。

曉發武陽館即事書情

清晨策羸車，嘲哢聞春鷄。行將騎吏親，日與情愛睽。東風變林樾，南畝事耕犁。青菰冒白水，方塘接廣畦。雜英被長坂，野草蔓幽蹊。鳥鹵成沃壤，枯株發柔荑。芳樹鶯命鵲，深林麇引麕。杳杳途未極，團團日已西。哲士務纓弁，鄙夫戀蓬藜。終當稅塵駕，盥濯依春溪。



豐城劍池驛感題

龍劍昔未發泥沙相晦藏  
向非張茂先孰辨斗牛光  
神物不自達聖賢亦彷徨  
我行豐城野慷慨心內傷

奉使宜春夜渡新塗江陵路至黃蘗館路上遇

風雨作

草草理夜裝涉江又登陸  
望路殊未窮指期今已促  
傳呼戒徒御振轡轉林麓  
陰雲擁崑端霖雨當山腹  
震雷如在耳飛電來照目  
獸迹不敢窺馬蹄唯務速  
虔心若

齋禮濡體如沐浴萬竅相怒號百泉暗奔瀑危梁慮足  
跌峻坂憂車覆問我何以然前日受徵祿轉知人代事  
纓組乃微束向若家居時安枕春夢熟遵途稍已近候  
吏來相續曉霽心始安林端見初旭

細柳驛

細柳肅軍令條侯信殊倫棘門乃兒戲從古多其人神  
武今不殺介夫如播紳息駕幸茲地懷哉疎精神

渭水

呂叟年八十皤然持釣鉤意在靜天下豈唯食營丘師  
臣有家法小白猶尊周日暮駐征策愛茲清渭流

宮人斜絕句

一路斜分古驛前陰風切切晦秋煙鉛華新舊共冥冥  
日暮愁鴟飛野田

敷水驛

空見水名敷秦樓昔事無臨風駐征騎聊復捋髭鬚

朝元閣

繚垣複道上曾霄十月離宮萬國朝胡馬忽來清蹕去  
空餘臺殿照山椒

石甕寺

石甕寒泉勝寶井汲人迴挂青絲綆厨煙半逐白雲飛  
當畫老僧來灌頂

盤豆驛

盤豆綠雲上古郵望思臺下使人愁江充得計太子死  
日暮戾園風雨秋

晚渡揚子江却寄江南親故

返照滿寒流輕舟任搖漾  
支頤見千里煙景非一狀  
遠岫有無中片帆風水上  
天清去鳥滅浦迴寒沙漲  
樹晚疊秋嵐江空翻宿浪  
胷中千萬慮對此一清曠  
回首碧雲深佳人不可望

新安江路

深潭與淺灘萬轉出新安  
人遠禽魚淨山深水木寒  
嘯起青蘋末吟囑白雲端  
即事遂幽賞何心挂儒冠

月夜江行

扣船不得寐，浩露清衣襟。  
彌傷孤舟夜，遠結萬里心。  
幽興惜瑤草，素懷寄鳴琴。  
三奏月初上，寂寞寒江深。

江城夜泊寄所思

客程殊未極，艤棹泊迴塘。  
水宿知寒早，愁眠覺夜長。  
遠鐘和暗杵，曙月照晴霜。  
此夕相思意，搖搖不暫忘。

陪包諫議湖墅路中舉帆

同用山字

蕭蕭涼雨歇，景物望中閒。  
風際片帆去，煙中獨鳥還。  
斷

橋通遠浦野墅接秋山更喜陪清興樽前一解顏

富陽陸路

又入亂峯去遠程殊未歸煙蘿迷客路山巢落征衣  
石臨清淺晴雲出翠微漁潭明夜泊心憶謝玄暉

石塘路有懷院中諸公

迴合千峯裏晴光似畫圖征車隨返照候吏暎寒蕪  
石澗侵行逕溪雲拂路隅未酬知己分寧敢學潛夫

玉山嶺上作

悠悠驅疋馬征路上連崗晚翠深雲竇寒苔淨石梁荻  
花偏似雪楓葉不禁霜愁見前程遠空郊下夕陽

舟行夜泊

蕭蕭落葉送殘秋寂寞寒波急暝流今夜不知何處泊  
斷雲晴月引孤舟

曉發桐廬

客路去漫漫桐溪上水難扣船乘曉月敲枕聽迴灘煙  
重江楓濕沙平宿鷺寒閒吟試一望疑在畫屏看



夜汎臨平湖有寄

素彩皓通津孤舟入清曠已愛隔簾看還宜卷簾望隔  
簾卷簾當此時惆悵思君君不知

次滕老莊

征途無旅館當畫喜逢君羸病仍留客朝朝掃白雲

曉

曉風搖五兩殘月映石壁稍稍曙光開片帆在空碧

畫

孤舟漾暖景獨鶴下秋空安流日正晝淨綠天無風

晚

古樹夕陽盡空江暮靄收寂寞叩船坐獨生千里愁

夜

猿聲到枕上愁夢紛難理寂寞深夜寒青露落秋水

宿嚴陵

身羈從事驅征傳江入新安泛暮濤今夜子陵灘下泊

自慙相去九牛毛



權文公集卷六

欽定四庫全書

權文公集卷七

唐 權德輿 撰

雜詩

奉和常諫議奉送水部家兄上後書情寄諸兄  
弟仍通簡南宮親舊并呈兩省閣老院長

駟牡龍旂慶至今一門儒服輝華簪人望皆同照乘寶  
家風不重滿贏金護衣直夜南宮靜焚草清時左掖深

何幸末班陪兩地陽春欲和意難任

奉和史館張閣老以許陳二閣老長愛弟俱尚

書郎伯仲同時列在南北省會於左掖因而

有詠

伯仲盡時賢平興與潁川桂枝嘗徧折棟蓼更相鮮丹

地晨趨並黃扉夕拜聯豈如分侍從來就鳳池邊

主客水部二員

東西對行二閣老併在左掖也時語以  
為分就西垣則具美相類故戲書末韻

韋賓客宅與諸博士宴集

累抗乞身章湛恩北上庠賓筵徵稷嗣家法自扶陽簪  
組歡言久琴壺雅興長陰嵐冒苔石輕籟韻風篁佩玉  
三朝貴揮金百慮忘因知卧商雒豈勝白雲鄉

酬張秘監閣老喜太常中書二閣老與德輿同

日遷官相代之作

時秘書監亦  
同日拜命

珠樹共飛棲分封受紫泥正名推五字貴仕仰三珪繼  
組心知忝德輿代太常為禮部腰章事頗齊蓬山有佳句喜氣在

新題

國子柳博士兼領太常博士輒申賀贈

博士本秦官求才帖職難臨風曲臺淨對月璧池寒講  
學分陰重齋祠曉漏殘朝衣辨色處雙綬更宜看

過隱者湖上所居

蝸舍映平湖皤然一魯儒唯將酒作聖不厭谷多愚兵  
法窺黃石天官辨白榆行看軟輪起未可號潛天

從叔將軍宅薔薇花開太府常卿有題壁長句

因以和作



環列從容蹀躞歸風光駘蕩發紅薇鶯藏密葉宜新霽  
蝶繞低枝愛晚暉艷色當軒迷舞袖繁香滿逕拂朝衣  
名卿洞壑仍相近佳句新成和者稀

奉和許閣老霽後慈恩寺杏園看花同用花字

口號

時德輿  
當直

杏花微雨霽灼灼滿瑤華左掖期先至中園景未斜含  
毫歌白雪藉草醉流霞獨限金閨籍支頤啜茗花

奉和陳閣老寒食初假當直從東省往集賢因

過史館看木瓜花寄張蔣二閣老

畫漏沉沉倦瑣闥西垣東觀閱芳菲  
繁花滿樹似留客應為主人休澣歸

晚秋陪崔閣老張秘監閣老苗考功同遊昊天  
觀時楊閣老新直未滿以詩見寄斐然酬和  
有媿蕪音

方駕遊何許仙源去復歸  
縈迴留勝賞蕭洒出塵機  
泛菊賢人至燒丹姹女飛  
步虛清曉籟隱几吸晨暉  
竹徑

琅玕合芝田沆瀣晞銀鈎三洞字瑤笥六銖衣麗句翻  
紅藥佳期限紫微徒然一相望郢曲和應稀

春日同諸公過兵部王尚書林園

休沐君相近時容曳履過花間留客久臺上見春多松  
色明金艾鶯聲雜玉珂更逢新酒熟相與藉庭莎

與沈十九拾遺同遊棲霞寺上方夜於亮上人  
院會宿二首

攝山標勝絕暇日諧想矚縈紆松路深繞繞雲巖曲重

樓迴樹杪古像鑿山腹人遠水木清地深蘭桂馥層臺  
聳金碧絕頂摩淨綠下界誠可悲南朝紛在目焚香入  
古殿待月出深竹稍覺天籟清自傷人世促宗雷此相  
遇偃放從所欲清論松枝低閒吟茗花熟一生如土梗  
萬慮相桎梏永願事潛師窮年此棲宿

偶來人境外心賞幸隨君古殿煙霞夕深山松桂薰巖  
花點寒溜石磴掃春雲清淨諸天近諠塵下界分名僧  
康寶月上客沈休文共宿東林夜清猿徹曙聞

棲霞寺雲居室

一徑縈紆至此窮  
山僧盥漱白雲中  
閒吟定後更何事  
石上松枝常有風

天竺寺

香刹西天寺  
昔遊如夢中  
煙蘿迷俗駕  
猿狖應山童  
蕭颯松陰靜  
敲危石棧通  
雲霞棲半壁  
丹紺照晴空  
世界悲何已  
心期惜未同  
相看整歸轡  
花雨夕濛濛

題邵端公林亭

春光何處足柱史有林堂鶯轉風初暖花開日欲長  
畎池通舊水掃徑閱新芳更置盈樽酒時時醉楚狂

題隱者所居

一徑茅茨下千峯麋鹿羣鴻妻同懶逸漁父每知聞  
日暮烏擇木天陰山出雲此心終不動鼓腹向堯君

題崔山人草堂

竹徑茆堂接洞天閒持麈尾漱春泉世人車馬不知處  
時有歸雲到枕前

徐孺亭馬上口號并序

鍾陵東湖之南有亭亭中有二碑一則故曲江張公所製徐徵君碣一則北海李公所製放生池碑噫夫二君子久隨化往而二文之盛傳於天下貞元初余為是邦從事每將迎郊勞多經是間且以其高賢好生皆醇仁之首也因歎不得與二賢同時論文變損益亭址圯壞苔篆磷跖古風如在感舊依然而通壚在側平湖在下波流穀擊日月無窮因於馬上口號

絕句詩一首以寄愀愴

湖上荒亭臨水開  
龜文篆字積莓苔  
曲江北海今何處  
盡逐東流去不迴

哭劉四尚書

勒於碑陰

士有昔賢人  
天朝喪守臣  
才華推獨步  
聲氣幸相親  
理析環中妙  
儒為席上珍  
笑言成月旦  
風韻挹天真  
丹地膺推擇  
青油寄撫循  
豈言朝象魏  
翻是卧漳濱  
命賜龍泉重  
追榮密印陳  
撒絃驚物故  
庀具見家貧  
牢落風悲



笛沈澗涕泣巾只嗟萬里月非復柳營春黃卷碑文在  
青松隧路新音容無處所歸作北邙塵

張工部至薄寒山下有書無由馳報轉車之至  
倍切悲懷

書來遠自薄寒山繚繞洮河出古關今日難裁秣陵報  
薤歌寥落柳車還

工部發引日屬傷足卧疾不遂執紼

子春傷足日況有寢門哀元伯歸全去無由白馬來笳

簫里巷咽龜筮暮田開片石潺湲淚含悲叙史才

從事淮南府過亡友楊校書舊廳感念愀然

故人隨化往倏忽今六霜及我就拘限清風留此堂松  
竹逾映蔚芝蘭自銷亡絕絃罷流水聞笛同山陽頽如  
冰玉姿粲若鸞鳳章欲翥推勁翮先秋落貞芳正平賦  
鸚鵡文考頌靈光二子古不弔夫君今何傷黃墟既杳  
杳玄化亦茫茫豈必限宿草含悽洒衣裳

哭李晦羣崔季文二處士

華封西祝堯貴壽多男子二賢無主後貧賤大壯齒未  
成鴻鵠姿遽頽驂騑趾子淵將叔度自古不得已

觀葬者

塗窮隨晝哭數里至松門貴盡人間禮寧知逝者魂笳  
簫出古陌烟雨閉寒門萬古皆如此傷心反不言

成南陽墓

枯茆沒古基駁薜蔽豐碑向晚微風起如聞坐嘯時

周平西墓

英威今寂寞陳跡對崇丘壯志清風在荒墳白日愁窮  
泉那復曉喬木不知秋歲歲寒塘側無人水自流

蕪小小墓

萬古荒墳在悠然我獨尋寂寥紅粉盡冥寞黃泉深蔓  
草映寒水空郊暖夕陰風流有佳句吟眺一傷心

題柳郎中茅山故居

下馬荒堦日欲曛潺潺石溜靜中間鳥啼花落人聲絕  
寂寞山窓掩白雲

哭張十八校書

數日前辱書未及  
還答俄承凶訃

芸閣為郎一命初  
桐州寄傲十年餘  
魂隨逝水歸何處  
名在新詩衆不如  
蹉跎江浦生華髮  
牢落寒原會素車  
更憶八行前日到  
含悽為報秣陵書

題亡友江畔舊居

寥落留三徑  
柴扉對楚江  
蟪蛄集暗壁  
蜥蜴走寒窓  
松蓋敲書幌  
苔衣上酒缸  
平生斷金契  
到此淚成雙

權文公集卷七

欽定四庫全書

權文公集卷八

唐 權德輿 撰

雜詩

德宗神武孝文皇帝挽歌詞

三首

覆露雍熙運澄清教化源賡歌凝庶績羽舞被深思纂  
業光文祖貽謀屬孝孫恭聞留末命猶是愛元元

梯航來萬國玉帛慶三朝湛露恩方泱薰風曲正調晏

車悲鹵簿廣樂遏簫韶最愴號弓處龍髯上紫霄  
常時栢梁宴玉葦恩波遍今日穀林歸靈輶烟雨霏喬  
山森羽騎渭水擁旌旂仙馭何由見耰田鳥自飛

順宗至德大安孝皇帝挽歌

三首時充鹵簿使

十葉開昌運三辰麗德音薦功期瘞玉昭儉每捐金解  
澤皇風遍虞泉白日沉仍聞起居注焚奏感人心  
孝理本憂勤玄功在嗇神睿圖傳上嗣壽酒比家人仙  
馭三清遠行宮萬象新小臣司吉從還扈屬車塵



候曉傳清蹕共瞻宮輅出迎風引綵旒遙想望陵愁弓  
劍隨雲氣衣冠奉月遊空餘駕龍處搖落鼎湖秋

昭德皇后挽歌詞

淮水源流遠塗山禮命升往年求故劍今夕祔初陵鸞  
鏡金波溢暈衣玉彩凝千年子孫慶孝理在蒸蒸

大行皇太后挽歌詞

三首王氏

筮水靈源濬因山祔禮崇從龍開隧路合壁向方中殿  
帳金根出廡衣玉座空唯餘文母化陰德滿公宮

配禮歸清廟靈儀出直城九虞寧厚載一惠易尊名曉  
漏銅壺溢秋風羽翼輕容車攀望處孺慕切皇情

哀笳出長信嗚咽宮車進寶劍入延津淒涼祠殿新青  
烏靈兆久白燕瑞書頻從此山園夕金波昭玉塵

惠昭皇太子挽歌詞二首

前星落慶霄薤露逐晨颿宮仗黃麾出仙遊紫府遙空  
嗟鳳吹去無復鷄鳴朝今夜西園月重輪更寂寥

東朝聞楚挽羽翮依依轉天歸京兆新日與長安遠蘭

芳落故殿桂影銷空苑騎吹咽不前風悲九旗卷

贈文敬太子挽歌詞二首

盤石公封重瑤山贈禮尊歸前榮備物樂善積深恩  
鴈沼寒波咽鸞旌夕吹翻唯餘西靡樹千古灞陵原

銅壺晚漏初羽翼擁塗車方外留鴻寶人間得善書  
清笳悲畫綬朱郎散長裾還似緱山駕飄颻向碧虛

贈鄭國莊穆公主挽歌二首

追飾崇湯沐遺芳藹禁闌秋原森羽衛夜壑掩容輝  
睿

藻悲難盡公宮望不歸笳簫向烟霧疑是綵鸞飛  
舊館閉平陽客車啓壽堂露凝薜英落風度薤歌長淑  
德圖書在皇慈禮命彰淒涼灞川曲壑樹已成行

贈魏國憲穆公主挽歌詞

二首

漢制榮車服周詩美肅雍禮尊同姓主恩錫大名封外  
館留圖史陰堂閉德容睿詞悲薤露千古仰芳蹤  
秦樓曉月殘鹵簿列才官紅綬蘭桂歇粉田風露寒凝  
笳悲馬清鏡掩孤鸞愍冊徽音在都人雪涕看

贈梁國惠康公主挽歌詞 二首

外館嬪儀貴中參睿渥深初筭橫白玉盛服鏤黃金風  
度簫聲遠河低婺彩沉夜臺留冊謚悽愴即徽音

杳靄異湘川飄飄駕紫烟鳳樓人已去鸞鏡月空懸霧  
濕湯沐地霜凝脂粉田音容無處所應在玉皇前

故太尉兼中書令贈大師西平王挽歌詞

翊戴推元老謀猷合大君河山封故地金石表新墳劍  
履悲長夜笳簫咽暮雲還經誓師處薤露不堪聞

故司徒兼侍中贈大傅北平郡王挽歌詞

授律勲庸盛居中鼎鼐和佐時調四氣宣力靜三河忽  
訪天京兆空傳漢伏波今朝麟閣上偏軫聖情多

奉和禮部李尚書酬楊著作竹亭歌

直城朱戶相邈連九達丹轂聲聞闌春官自有花源賞  
終日南山當目前晨搖玉珮趨溫室暮入竹溪疑洞天  
烟消雨過看不足晴翠鮮飈透深谷獨謠一曲泛沅霞  
閒對千竿連淨綠紫迴䟽鑿隨勝地石磴巖扉光景異

虛齋寂寂清籟吟幽澗紛紛雜英墜家承麟趾貴劍有  
龍泉賜上奉明時事無事人間方外興偏多能以簪纓  
狎薜蘿常通內學青蓮偈更奏新聲白雪歌風入松雲  
歸棟鴻飛滅處猶目送蝶舞間時夢忽成蘭臺有客叙  
交情反照中林曳履聲直為君恩催造膝東方辨色謁  
承明

奉和張僕射朝天行

元侯重寄貞師律三郡四封今靜謐丹轂常思闕下來

紫泥忽自天中出軍裝喜氣倍超程千騎鳴珂入鳳城  
周王致理稱申甫今日賢臣見明主拜恩稽首紛無已  
凝旒前席皇情喜逢時自是山出雲獻可還同石投水  
昔歲褒衣梁甫吟當時已有致君心專城一鼓妖氛靜  
擁旆十年天澤深日日披誠奉昌運王人織路傳清問  
仙醞嘗分玉葦濃御閑更輟金羈駿元正前殿朝君臣  
一人負宸百福新宮懸綵仗儼然合瑞氣爐烟相與春  
萬年枝上東風早珮玉晨趨光景好塗山已見首諸侯



麟閣終當畫元老溫室沉沉漏刻移退朝賓侶每相隨  
雄詞樂職波濤闊曠度交歡雲霧披自古全才貴文武  
懦夫只解冠章甫見公抽匣百鍊光試欲磨鉛諒無取

和李中丞慈恩寺清上人院牡丹花歌

澹蕩韶光三月中牡丹偏自占春風時過寶地尋香徑  
已見新花出故叢曲水亭西杏園北濃芳深院紅霞色  
擢秀全勝珠樹林結根幸在青蓮域艷蕊鮮房次第開  
含烟洗露照蒼苔麗眉倚仗禪僧起輕翅繁枝舞蝶來

獨坐南臺時共美閒行古剎情何已花間一曲奏陽春  
應為芬芳比君子

錫杖歌送明楚上人歸佛川

上人遠自西天至頭陀行遍國朝寺口翻貝葉古字經  
手持金策聲泠泠護法護身唯振錫石瀨雲溪深寂寂  
乍來松徑風更寒遙暎霜天月成魄後夜空山禪誦時  
寥寥挂在枯樹枝真法常傳心不住東西南北隨緣路  
佛川此去何時迴應真莫便遊天台

馬秀才草書歌

大理馬  
正之二

伯英草聖稱絕倫後來學者無其人白眉年少未弱冠  
落紙紛紛運纖腕初聞之子十歲餘當時時輩皆不如  
猶輕昔日墨池學未許前賢團扇書艷彩芳姿相點綴  
水映荷花風轉蕙三春併向指下生萬象爭分筆端勢  
有時當暑如清秋滿堂風雨寒颼颼乍疑崩崖瀑水落  
又見古木飢飈愁變化縱橫出新意眼看一字千金貴  
憶昔謝安問獻之時人雖見那得知

離合詩贈張監閣老

黃葉從風散暗嗟時節換忽見鬢邊霜勿辭林下觴躬  
行君子道身負芳名早帳殿漢賓儀巾車塞垣草交情  
劇斷金文律每招尋始知蓬山下如見古人心

奉酬禮部閣老轉韻離合見贈秘書監張薦

移居既同里多幸陪君子弘雅重當朝弓旌早見招植  
根瓊林圃直夜金闈步勸深子玉銘力競相如賦間閭  
向春闈日復想光儀格言信難繼木石強為詞

禮部權侍郎閣老史館張秘監閣老有離合酬

贈之什宿直吟翫聊繼此章中書舍人崔汾  
脉脉羨佳期月夜吟麗詞諫垣則隨步東觀方承顧雪  
林消艷陽簡冊漏華光坐更芝蘭室千載各芬芳節苦  
文俱盛即時仍並命翩翩紫霄中羽翮相輝映

同前中書舍人楊於陵

校德盡珪璋才臣時所揚放情寄文律方茂經邦術王  
獻偕發揮十載契心期畫遊有嘉話書法無隱辭信茲

酬和美言與芝蘭比昨來念吟繹日覺祛蒙鄙

同前給事中許孟容

史才司秘府文哲今超古亦有擅風騷六聯文墨曹左  
賢三代意工藝千金字花識從臣謠人推仙閣吏如登  
崑閬時口誦靈真詞孫簡下威鳳系霜瓊玉枝

同前給事中馮伉

車馬退朝後申懷在文友動詞宗伯雄重美良史功亦  
曾吟鮑謝二妙尤增價雨子付反霜鴻戾天匝樹烏啼夜

覃思各縱橫  
早擅希代名  
息心欲焚硯  
自硯陪羣英

同前戶部侍郎潘孟陽

詠歌有離合  
永夜觀酬答  
筭中操綵牋  
竹簡何足編  
意深俱妙絕  
心契交情結  
計彼官接聯  
言初並清切  
翔集本相隨  
羽儀良在斯  
煙雲競文藻  
因喜翫新詩

同前國子司業武少儀

少年慕時彥  
小悟文多變  
木鐸比羣英  
八方流德聲  
雷陳美交契  
雨雪音塵繼  
恩顧各飛翔  
因詩覩瑰麗  
傳野

絕遺賢人希有盛遷早飲風與雅日詠贈酬篇

春日雪寄上張二十九丈大監請招禮部權曹

長迴文絕句戶部侍郎潘孟陽

春梅雜落雪發樹幾花開直須盡興飲仁里願同來

以下

連二首俱  
係回文體

奉酬秘書監張薦

遲遲日氣暖漫漫雪天春知君欲醉飲思見此交親

酬前



酒杯春醉好飛雪晚庭閒久憶同前賞中林對遠山

五雜組

五雜組旗亭客往復還城南陌不得已天涯謫

數名詩

一區揚雄宅恬然無所欲二頃季子田歲晏常自足三  
端固為累事物反微束四體苟不勤安得豐菽粟五侯  
誠晞煜榮甚或為辱六翮未騫翔虞羅乃相觸七人稱  
作者杳杳有遐躅八桂挺竒姿森森照初旭九歌傷澤

畔怨思徒刺促十翼有格言幽貞謝浮俗

星名詩

虛懷何所欲歲晏聊懶逸雲翼謝翩翻松心保貞實風  
秋景氣與葉落井徑出陶然美酒酣所謂幽人吉自當  
輕尺璧豈復掃一室安用簪進賢少微斯可必

卦名詩

節變忽驚春臨風騁望頻支頤倦書幌步履整山中時  
鳥漸成曲雜芳隨意新曙霞連觀闕綺陌麗咸秦天地

今交泰雲雷昔溝屯中孚諒可樂書此示家人

藥名詩

七澤蘭房千里春  
瀟湘花落石鱗鱗  
有時浪白微風起  
坐釣藤陰不見人

古人名詩

藩宣秉戎寄衡石崇勢位  
年紀信不留弛張良自愧  
樵蘓則為愜瓜李斯可畏  
不顧榮官尊每陳豐畝利  
家林類巖嶽負郭躬斂積  
忌滿寵生嫌養蒙恬勝智  
踈鐘皓

月曉晚景丹霞異澗谷永不諼山梁異無累頗符生肇  
學得展禽尚志從此直不疑支離踈世事

州名詩寄道士

金蘭同道義瓊簡復芝田平楚白雲合幽崖丹桂連松  
峯明愛景石竇納新泉興永南山壽歡隨萬福延

八音詩

金谷盛繁華涼臺列簪組石崇留客醉綠珠當座舞  
淚可銷骨冶容竟何補竹林諒賢人滿酌無所苦  
窮居

容宴豆儒室貴環堵土鼓與汙尊願神則為愈革道當  
在早謙光斯可取木鴈才不才吾知養生主

建除詩

建節出王都雄雄大丈夫除書加右職騎吏擁前驅滿  
月張繁弱含霜耀鹿盧平明躍騷衷清夜擊珊瑚定遠  
功那比平津策乃迂執心思報國効節在忘軀破膽銷  
丹浦顰蛾舞綠珠危冠徒自愛長轂事應殊成績封千  
室疇勞使五符收功輕驃衛致理邁黃虞開濟今如此

英威古不侔，閑關草玄者。無乃誤為儒。

六府詩

金罍映玉俎，賓友紛宴喜。木蘭泛方塘，桂酒啓皓齒。水榭臨空迴，酣歌當座起。火雲散奇峯，瑤瑟韻清徵。土梗乃虛論，康莊有逸軌。穀域一編書，談笑佐天子。

三婦詩

大婦刺繡文，中婦縫羅裙。小婦無所作，嬌歌遏行雲。丈人且安坐，金爐香正薰。

安語

巖巖五岳鎮方輿八極廓清氛  
禊除揮金得謝歸里閭  
象牀角枕支體舒

危語

被病獨行逢乳虎狂風駭浪失棹櫓  
舉人看榜聞曉鼓  
孱夫孽子遇妬母

大言

華嵩為珮河為帶南交北朔跬步內搏鵬  
作腊巨鼈繪

伸舒軼出元氣外

小言

醯鷄伺晨駕蚊翼毫端棘刺分畛域蛛絲結構聊廕息  
蟻垤崔嵬不可陟

權文公集卷八



欽定四庫全書

權文公集卷九

唐 權德輿 撰

雜詩

雜詩 五首

婉彼嬴氏女吹簫偶簫史綵鸞駕非烟綽約兩仙子神  
期諒交感相顧乃如此豈比成都人琴心中夜起

陽臺巫山上風雨忽清曠朝雲與遊龍變化千萬狀魂

交復目斷縹緲難比况蘭澤不可親凝情坐惆悵  
淇水春正綠上宮蘭葉齊光風兩搖蕩鳴珮出中閨一  
顧授橫波千金呈瓠犀徒然路傍子怱怱復淒淒  
碧樹泛鮮飈玉琴含妙曲佳人掩鸞鏡婉婉凝相矚文  
桂映東素香黛宜暎綠寂寞遠懷春何時來比目  
含顰倚瑤瑟丹慙結繁慮失身不自還萬恨隨玉筋蘿  
蕪山下路團扇秋風去君看心斷時猶在目成處

廣陵詩

廣陵寔佳麗隋季此為京  
八方稱輻輳五達如砥平  
大旆映空色笳簫發連營  
臺出重霄金碧摩顙清交  
馳流水轂迴接浮雲甍青  
樓旭日映綠野春風晴噴  
玉光照地顰蛾價傾城燈  
前互巧笑陌上相逢迎飄  
飄翠羽薄淹映紅襦明蘭  
麝遠不散管絃閒自清曲  
士守文墨達人隨性情茫  
茫竟同盡冉冉將何營且  
申今日歡莫務身後名肯  
學諸儒輩書窓誤一生

古意

家人強進酒酒後能忘情持杯未飲時衆感紛已盈明  
月照我房庭柯振秋聲空庭白露下枕席涼風生所思  
萬里餘水閣山縱橫佳期憑夢想未曉愁鷄鳴願將一  
心人當年歡樂平長筵映玉俎素手彈秦箏暖睇呈巧  
笑惠音激淒清此願良未果永懷空如醒

雜言和常州李員外副使春日戲題十首

隨風柳絮輕映日杏花明無奈花深處流鶯三數聲  
蘭橈盡舸轉花塘水映風搖路漸香任興不知行近遠

更憐微月照鳴榔

簷前曉色驚雙鶯戶外春風舞百花  
粉署可憐閒對此  
唯令碧玉泛沝霞

枕上覺窓外曉怯朝光驚曙鳥  
花墜露滿芳沼柳如絲  
風裊裊佳期遠相見少試一望魂杳渺

閒庭無事獨步春輝韶光滿目落  
葉盈衣芳樹交柯文  
禽並飛婉婉彼君子悵然有違對  
酒不飲橫琴不揮不揮  
者何知音誠希

江春好遊衍處處芳菲積綵舫入花津香車依柳陌綠  
楊烟裊裊紅蕊鶯寂寂如何愁思人獨與風光隔

曙月漸到窓前移樽更就芳筵輕吹乍搖蘭燭春光暗  
入花鈿絲竹偏宜靜夜綺羅共占韶年不遣通宵盡醉  
定知辜負風烟

露洗百花新簾開月照人綠窓銷暗燭蘭徑掃清塵雙  
燕頻驚夢三桃競報春相思寂不語珠淚灑紅巾

雨歇風輕一院香紅芳綠翠接東牆春衣試出當軒立

定被鄰家暗斷腸

春風半春光遍柳如絲花似霏歸心勞夢寐遠目傷遊  
眄可惜長安無限春年年空向江南見

相思曲

少小別潘郎嬌羞倚畫堂有時裁尺素無事約殘黃鵲  
語臨粧鏡花飛落繡牀相思不解說明月照空房

古樂府

光風澹蕩百花吐樓上朝朝學歌舞身年二八壻侍中

幼妹承恩兄尚主綠窓珠箔繡鴛鴦侍婢先焚百和香  
鶯啼自出不知曙寂寂羅幃春夢長

渡秋江二首

秋江平秋月明孤舟獨夜萬里情萬里情相思遠人不  
見兮淚滿眼

渡秋江兮渺然望秋月兮嬋娟色如練萬里遍我有所  
思兮不得見不得見兮露寒水深耿遙夜兮傷心

秋閨月



三五二八月如練海上天涯應共見不知何處玉樓前  
乍入深閨玳瑁筵露濃香逕和愁坐風動羅帷照獨眠  
初捲珠簾看不足斜抱箜篌未成曲稍映粧臺臨綺窻  
遙知不語淚雙雙此時愁望知何極萬里秋天同一色  
靄靄遙分陌上光迢迢對此閨中憶早晚歸來歡讌同  
可憐歌吹月明中此夜不堪腸斷絕願隨流影到遼東

薄命篇

昔住邯鄲年尚少只是嬌羞弄花鳥青樓碧紗大道邊

綠楊日暮風裊裊嬋娟玉貌二八餘自憐顏色花不如  
麗質全勝秦氏女葉砧寧用專城居歲去年來年漸長  
青春紅粉全堪賞玉樓珠箔但閒居南陌東城詎來往  
韶光日日看漸遲標梅既落行有時寧知燕趙娉婷子  
翻嫁幽并游侠兒年年結束青絲騎出門一去何時至  
秋月空懸翡翠簾春幃嬾卧鴛鴦被沙塞經時不寄書  
深閨愁獨意何如花前拭淚情無限月下調琴恨有餘  
離別苦多相見少洞房愁夢何由曉閒看雙燕淚霏霏

靜對空牀魂悄悄鏡裏紅顏不自禁  
陌頭香騎動春心  
為問佳期早晚是人人總解有黃金

放歌行

夕陽不駐東流急榮名貴在當年立  
青春虛度無所成  
白首銜悲亦何及拂衣西笑出東山  
君臣道合俄頃間  
一言一笑玉墀上變化生涯如等閒  
朱門杳杳列華戟  
座中皆是王侯客鳴環動珮暗珊珊  
駿馬花駘白玉鞍  
十千斛酒不知貴半醉留賓邀盡歡  
銀燭煌煌夜將久

侍婢金疊瀉春酒春酒盛來琥珀光暗聞蘭麝幾船香  
乍看皓腕映羅袖微聽清歌發杏梁雙環美人君不見  
一一皆勝趙飛燕迎杯乍舉石榴裙勻粉時交合歡扇  
未央鐘漏醉中聞聯騎朝天曙色分雙闕烟雲遙靄靄  
五衢車馬亂紛紛罷朝鳴珮驟歸鞍今日還同昨日歡  
歲歲年年恣遊讌出門滿路光輝遍一身自樂何足言  
九族為榮真可羨男兒稱意須及時閉門下帷人不知  
年光看逐轉蓬盡徒詠東山招隱詩

雜言旅館雪晴又觀新月衆興所感因成雜言

寥寥深夜雪初晴樓上雲開月漸明  
池中片影依稀見簾外清光遠近生  
皎皎晴空疑破鏡廣庭積素偏相映  
珠簾卷却光更深玉指持來色逾淨  
夢覺青樓最可憐嬋娟素魄滿寒天  
天地寥寥同一色秦淮楚江無限極  
歸鴻斷猿何處聲深閨旅館還相憶  
長安五侯華閣開嘉賓列座傾金罍  
賞明月翫沆雪纖手蛾眉座中設清  
歌一聲無斷絕夜已久樂未闌孤裘  
獸炭不知寒珠環

翠珮聲珊珊履舄紛紜桂袖攢朱顏倚醉盡君歡人生  
少年全不久相看且勸杯中酒丈夫富貴自有期映雪  
讀書徒白首

玉臺體

鴛啼蘭已紅見出鳳城東粉汗宜斜日衣香逐上風情  
來不自覺暗駐五花驄

嬋娟二八正嬌羞日暮相逢南陌頭試問佳期不肯道  
落花深處指青樓

隱映羅衫薄，輕盈玉腕圓。相逢不肯語，微笑畫屏前。  
知向遼東去，由來幾許愁。破顏君莫恠，嬌小不禁羞。  
樓上吹簫罷，閨中刺繡閑。佳期不可見，盡日淚潺潺。  
淚盡珊瑚枕，魂銷玳瑁牀。羅衣不忍看，羞見繡鴛鴦。  
君去期花時，花時君不至。簷前雙燕飛，落妾相思淚。  
空閨滅燭後，羅幌獨眠時。淚盡腸欲斷，心知人不知。  
秋風一夜至，吹盡後庭花。莫作經時別，西鄰是宋家。  
獨自披衣坐，更深月露寒。隔簷腸欲斷，爭敢下階看。

昨夜裙帶解今朝蟾子飛  
鉉華不可棄莫是葉砧歸  
萬里行人至深閨夜未眠  
雙眉燈下掃不待鏡臺前

贈友人

時友人新有別恨者

知向巫山逢日暮輕鞋玉佩整  
淹流曉隨雲雨歸何處  
還是襄王夢覺愁

舟行見月

月入孤舟夜半晴寥寥霜鴈兩三聲  
洞房燭影在何處  
欲寄相思夢不成



雜興五首

叢鬢愁眉時勢新  
初筭絕代北方人一顰一笑千金重  
肯似成都夜失身

乍聽絲聲似竹聲  
又疑丹穴九雛驚  
金波露洗淨於晝  
寂寞不堪深夜情

琥珀樽開月映簷  
調絃理曲指纖纖  
含羞斂態勸君住  
更奏新聲刮骨鹽

乳燕雙飛鶯亂啼  
百花如繡照深閨  
新粧對鏡知無比

微笑時時出瓠犀

巫山雲雨洛川神  
珠襪香腰穩稱身  
惆悵粧成君不見  
含情起立問傍人

權文公集卷九

欽定四庫全書

權文公集卷十

唐 權德輿 撰

雜詩

祇役江西路上以詩代書寄內

辛苦事行役風波倦晨暮搖搖結遐心靡靡即長路別  
來如昨日每見缺蟾兔潮信催客帆春光變江樹官遊  
豈云愜歸夢無復數愧非超曠姿循此跼促步笑言思

暇日規勸多遠度鶉服我久安荆釵君所慕伊予多昧  
理初不涉世務適因擁腫材成此嬾慢趣一身常抱病  
不復理章句胸中無町畦與物且多忤既非大川楫則  
守南山霧胡為出處間徒使名利污羈孤望予祿孩穉  
待我舖未能即忘懷恨恨以此故終當稅鞅鞅豈待畢  
婚娶如何久人寰俯仰學舉措衡茅去迢遞水陸兩馳  
驚晰晰窺曉星塗塗踐朝露靜聞田鶴起遠見沙鷗聚  
恠石不易躋急湍那可泝漁商聞遠岸烟火明古渡下

碇夜已深上碇波不駐畏途信非一離念紛難具枕席  
有餘清壺觴無與晤南方出蘭桂歸日自分付北窓留  
琴書無乃委童孺春江足魚鴈彼此勤尺素早晚到中  
閨怡然兩相顧

夜泊有懷

樓鳥向前林暝色生寒蕪孤舟去不息衆感非一途川  
程方浩淼離思紛鬱紆轉枕眼未熟擁衾淚已濡窘然  
風水上海食疲朝晡心想洞房夜知君還向隅

自桐廬如蘭溪有寄

東南江路舊知名，惆悵春深又獨行。  
新婦山頭雲半斂，女兒灘上月初明。  
風前蕩颺雙飛蝶，花裏間關百轉鶯。  
滿目歸心何處說，敲眠搔首不勝情。

相思樹

家寄江東遠，身對江西春。  
空見相思樹，不見相思人。

石楠樹

石楠紅葉透簾春，憶得粧成下錦茵。  
試折一枝含萬恨。

分明說向夢中人

斗子灘

斗子灘頭夜已深  
月華偏照此時心  
春江風水連天濶  
歸夢悠揚何處尋

黃蘗館

駟車振楫越山川  
候曉通宵冒煙雨  
青楓浦上魂已銷  
黃蘗館前心自苦

清明日次弋陽

自歎清明在遠鄉  
桐花覆水葛溪長  
家人定是持新火  
點作孤燈照洞房

中書夜直寄贈

通籍在金閨  
懷君百慮迷  
迢迢五夜永  
脉脉兩心齊  
步履疲青瑣  
開緘倦紫泥  
不堪風雨夜  
轉枕憶鴻妻

病中寓直代書題寄

愚夫何所任  
多病感君深  
自謂青春壯  
寧知白髮侵  
寢興勞善祝  
踈嬾愧良箴  
寂寞聞宮漏  
那堪直夜心



端午日禮部宿齋有衣服綵結之貺以詩還荅  
良辰當五日偕老祝千年綵縷同心麗輕裾映體鮮寂  
寥齋晝省欸曲擘香牋更想傳觴處孫孩遍目前

酬九日

重九共遊娛秋光景氣殊他時頭似雪還對插茱萸

和九日從楊氏姊遊

秋光風露天令節慶初筵易象家人吉閨門女士賢招  
邀菊酒會屬和柳花篇今日同心賞全勝落帽年

上巳日貢院考雜文不遂赴九華觀祓禊之會

以二絕句申贈

三月韶光處處新  
九華仙洞七香輪  
老夫留滯何由往

珉玉相和正遶身

時以沽美玉為詩題

禊飲尋春興有餘  
深情婉婉見雙魚  
同心齊體如身到  
臨水煩君便祓除

和九華觀見懷貢院八韻

上巳好風景  
仙家足芳菲  
地殊蘭亭會  
人似山陰歸  
丹

竈綴珠掩白雲巖徑微真官集女士虛室涵春輝拘限  
心杳杳歡言望依依滯茲文墨職坐與琴觴連麗曲滌  
煩虛幽緘發清機支頤一吟想恨不雙翻飛

桃源篇

小年嘗讀桃源記忽覩良工施繪事巖徑初欣繚繞通  
溪風轉覺芬芳異一路鮮雲雜彩霞漁舟遠遠逐桃花  
漸入空濛迷鳥道寧知掩映有人家龐眉秀骨爭迎客  
鑿井耕田人世隔不知漢代有衣冠猶說秦家變阡陌

石髓雲英甘且香仙翁留飮出青囊相逢自是松喬侶  
良會應殊劉阮郎內子閒吟倚瑤瑟翫此沉沉銷永日  
忽聞麗曲金玉聲便使老夫思閣筆

新月與兒女夜坐聽琴舉酒

泥泥露凝葉騷騷風入林以茲皓月圓不厭良夜深列  
坐屏輕簟放懷絃素琴兒女各冠笄孫孩逸衣襟乃知  
大隱趣宛若滄洲心方結偕老期豈憚華髮侵笑語向  
蘭室風流傳玉音愧君袖中字價重雙南金

七夕

今日雲輶渡鵲橋，應非脉脉與迢迢。  
家人競喜開粧鏡，月下穿針拜九霄。

縣君赴興慶宮朝賀，載之奉行冊禮，因書即事。  
合巹交歡二十年，今朝比翼共朝天。  
風傳漏刻香車度，日照旌旗綵仗鮮。  
顧我華簪鳴玉珮，看君盛服耀金鈿。  
相期偕老宜家處，鶴髮魚軒更可憐。

元和元年蒙恩封成紀縣伯時室中封安喜縣

君感慶兼懷聊申賀贈

啟土封成紀宜家縣安喜同欣井賦開共受閨門祉珩  
璜聯采組琴瑟諧宮徵更待懸車時與君歡暮齒

河南崔尹即安喜從兄宜于室家四十餘歲一

昨寓書病傳永寫告身既枉善祝因成絕句  
五色金光鸞鳳飛三川墨妙巧相輝尊崇善祝今如此  
共待曾玄捧翟衣

奉使豐陵職司鹵簿通宵涉路因寄內

綵仗列森森行宮夜漏深  
爰鉦方啟路鉦鼓正交音  
曙月思蘭室前山辯穀林  
家人念行役應見此時心

酬南園新亭宴會璩新第慰慶之作時任賓客  
南亭烟景濃平視中南峯  
官閒似休沐盡室來相從  
日抱漢陰甕或成蝴蝶夢  
樹老欲連雲竹深疑入洞  
歡言交羽觴列坐儼成行  
歌吟不能去待此明月光  
好速蘊明識內顧多慙色  
不厭梁鴻貧常譏伯宗直  
予壻信時英諫垣金玉聲  
男兒纔弱冠射策幸成名  
偃放斯自足

脩然去營欲散木固無堪虛舟常任觸大隱本無心喜  
君流好音相期懸車歲此地即中林

七夕見與諸孫題乞巧文

外孫爭乞巧內子共題文  
隱映花奩對參差綺席分  
鵲橋臨片月河鼓掩輕雲  
羨此嬰兒輩歡呼徹曙聞

太常寺宿齋有寄

轉枕挑燈候曉鷄相君應嘆太常妻  
長年多病偏相憶不遣歸時醉似泥



朝迴閱樂寄絕句

子城風暖百花初樓上龜茲引導車曲罷卿卿理駟馭  
細君相望意何如

中書宿齋有寄

銅壺漏滴斗闌干泛灩金波照露盤遙想洞房眠正熟  
不堪深夜鳳池寒

中書送勅賜齋饌戲酬

常日每齊眉今朝共解頤遙知大官膳應與衆雛嬉

勅賜長壽酒因口號以贈

恩霑長壽酒歸遺同心人滿酌共君醉一杯千萬春

冬至日宿齋時郡君南內朝謁因寄

清齋獨向圓丘拜盛服想君興慶朝明日一陽生百福  
不辭相望阻寒宵

發峽石路上却寄內

紗柵東行五谷深千峯萬壑雨沉沉細君幾日路經此  
應見悲翁相望心

貞元七年蒙恩除太常博士自江東來朝時與  
郡君同行西兵廟停車祝謁元和八年拜東  
都留守途次祠下追計前事已二十三年于  
茲矣時郡君以疾恙續發因代書却寄

憶昔辛未歲詔書下江壩盡室赴禮官脂車雜輜輶行  
役過梁苑淹留經園田

郡君表姊壻元僞為宣武從事  
權理宋君州郡從壻李融時為

鄭州各淹  
留累日

秦關信百二征駕逾三千仙掌眺蓮峯靈祠

謁金天騶馭儼已駐女巫爭來前動容既紛若展敬方

肅然

時為女巫所導過於恭敬不能具舉

蹇步入國門華簪拱祥煙諫曹

迨居守俟已十六遷及茲東乘轅二十餘三年盛明受

恩澤清近皆聯翩忽當禮寺重俄忝相印懸陳力才不

任乞骸詞頗堅解龜罷金鼎賜劍猶龍泉鄙夫何所能

實賴中饋賢談笑皆體遠箴規諒才全拜恩理晨裝詔

使來駢聞風生鞍馬疾日出旌旗鮮信宿歷道途曩遊


記周旋暫別亦不易沉疴今來痊醫方驗桐君道術依

竺乾庶憑神明佑得使疾恙蠲

醫工輔氏深于藥清診益切大比丘尼優曇持

念精至並約同  
永懷心如悵引望脰已瘳離披夏雲盡  
來累路將護

皎鏡秋月圓開緘諷色絲撰日馳平肩延企勞夢寐涕  
涕暗潺湲想已給經茲還復申祝延攝拜奠清醑相期  
保華顛遠慙周君較聊擬顧彥先慙慙俟來報淚墨書  
此篇



權文公集卷十